

## La anime furlane di Pasolini in sene a Friuli Doc

“Di chesta tiara lontana”, spettacul promovût di ARLeF e Teatro della Sete, i fasarà onôr al poete, a cent agns che al è nassût

Friûl Doc al va indevant cul percors dedicât aes figuris di ponte dal panorame leterari furlan, un progjet promovût de ARLeF - Agenzie Regjonâl pe Lenghe Furlane, in colaborazion cul Comun di Udin, e cu la produzion dal Teatro della Sete. In ocasion de edizion numar 28 de rassegne enogastronomiche, **joibe ai 8 di Setembar, aes 21 te Cort Morigo**, al è di fat in program “**Di chesta tiara lontana**”, leture seniche cun musiche e dissens dal vîf sui agns furlans di Pier Paolo Pasolini. La jentrade e je libare. Par informazions si pues scrivi a [arlef@regione.fvg.it](mailto:arlef@regione.fvg.it).

*«Dopo de esperienze positive dal an passât, cuant che il Teatro della Sete al à tratinât un ritrat cetant biel di Carlo Sgorlon, – al à dit il president de ARLeF, Eros Cisilino – pe edizion rinovade di Friûl Doc il public al podarà cognossi la sensibilitât e l'amôr pe marilenghe di un altri furlan innomenât come Pasolini. Un poete, regjist e scritôr che al à savût doprà il furlan tant che un strument par grancj risultâts leteraris, in poesie e in prose, che ducj o cognossin il lôr valôr. “Di chesta tiara lontana” al rimarche la profunditât de sô anime furlane e apassionade, in ocasion dai cent agns che al è nassût».*

Cun chest spettacul multimedial, il public al podarà duncje cognossi l'incjant dal Pasolini esordient, ma ancje la disilusion dal poete aromai madûr. Un confront pussibil in graciis des letaris e dai scrits autobiografics che a vignaran puartâts in sene des vôs di Caterina Di Fant e di Valentina Rivelli, acompagnadis de musiche dal vîf ideade pe ocasion di Giorgio Parisi: une colone sonore creade tignint cont de formazion musicâl di Pasolini intai agns furlans, ma soredu buine di riclamâ lis emozions e i sentimenti dispès esprimûts par chel paisaç che i jere tant cjâr e che al sarà contât in maniere visive cu lis imagjins e cui dissens dal vîf di Serena Giacchetta. I interpretis a puartaran il public a scuvierzi cualchi teme fundamentâl de esperienze leterarie dal inteletuâl intal timp passât in Patrie: l'ûs poetic dal furlan, l'autonomisim, e ancjemò l'incuintri tra la vite borghese e il mont contadin; e no pues mancjâ, in fin, la esperienze educative de Academiuta di lenga furlana.

Udin, prin di Setembar dal 2022

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. +39 340 3546890 / Adriana Cruciatti - mob. +39 335 6853775

<<<<<<<<<<<